

崇禎實錄

卷一至十七

崇禎元年正月至十七年三月

中央研究院
歷史語言研究所
校印本明實錄附錄之二

崇禎實錄

崇禎實錄卷之一

懷宗端皇帝名由棖字德宗弟也

始封信王熹宗無子帝嗣位

崇禎元年春正月乙丑朔上御皇極殿天下官來朝
永年縣大風而晝晦 丁卯翰林院編脩倪元璐
上言臣以試士復命還朝竊見群臣章奏凡攻崔魏
者必引東林為並案一則曰邪黨再則曰邪黨夫以
東林為邪黨將復以何名加諸崔魏崔魏而既邪黨
矣向之首効忠賢重論呈秀者又邪黨乎夫東林則
亦天下之才藪也其所宗主者大都稟清挺之標而

或絕人過刻樹高明之幟而或持論太深此之謂非
中行則可謂之非狂狷不可且天下之議論寧涉假
借而必不可不歸於名義士人之行已寧在矯激而
必不可不準諸廉隅自以假借矯激深咎前人於是
彪虎之徒公然起而背叛名義毀裂廉隅以至連篇
頌德匝地生祠夫頌德不已必將勸進生祠不已必
且呼嵩而人猶寬之曰無可柰何不得不然耳嗟乎
充一無可柰何不得不然之心又將何所不至哉議
者能以忠厚之心曲原此輩而獨持已甚之論苛責
吾徒臣所謂方隅未化者此也韓爌清忠有執上所

鑒知而建議殊有異同可為大怪詞臣文震孟正學強骨三月居官昌言獲罪有人如此雅謂千秋今起用之肯再下謬悠之譚日甚臣所謂正氣未伸者此也總之臣論不主調停而主別白韓爌文震孟不爭二臣之用舍而爭一日之是非至海內講學書院凡經逆璫矯旨折毀者併宜葺復如故蓋書院生祠相為貞勝生祠毀書院豈不當復哉上曰朕屢旨起廢務秉虛公有何方隅未化正氣未伸惟各書院不得倡言創復以滋紛擾史科給事中劉漢儒上言畿民之困自發難以來征派無虛日最苦者莫如招買

荳料給價常少給期常遲是名招買而實加派也請
以明年為始凡府州縣三分之二乞解本色上是之
下所司 壬申戶部尚書郭允厚言天津餉額未從
浙江湖廣山東南直而至豈從山東北直而至道府
餉司又實董之諸臣終歲經營軍中告匱臣攷其故
皆收運委官折乾入私索甚易濟實用則無請命所
司嚴禁之詔曰可 趣總督尚書張鳳翼赴山海關
移順天巡撫都御史王應豸於喜峰口 命司禮監
斥買魏忠賢田宅因以賜第請上曰勿以他屬朕俟
東西底定留賜第以待功臣因賜榜曰策勲府 上

御文華殿講畢諭九卿曰月食脩省令百官條對御
等大臣何未之見因手勅示之 兵部請移毛文龍
於蓋奪下廷議移督師於關門 辛巳命內臣俱入
直非受命不許出禁門 壬午上熹宗皇后張氏曰
懿安皇后仍居慈慶宮頒詔於天下 上以常州去
年水災折絹有差 癸未始御經筵 賜外官卓異
二十四人宴 發帑金三十萬分給宣大東江 命
安置降丁於延綏寧夏甘肅固原間初兵部處請之
山海關三屯營不許 乙酉復故大學士劉一燝韓
爌職 法司追論魏忠賢等上命磔忠賢尸於河間

斬崔呈秀尸于薊州又戮客氏尸天下快之 楊維
垣言倪元璐偏護東林疏言多悖謬元璐言自鄒元
標以偽學見謗逆璫遂以真儒自命學宮之席儼然
揖宣聖為平交講學諸公而在寧有此哉然則崔魏
乃今日對案以崔魏定邪正辟如以鏡別妍媸楊維
垣堅守故智阻抑正人代逆璫分謗何其謬也上是
之 丁亥以劉廷元為兵部尚書 太常寺卿阮大
鍼請戮先朝之奸言汪文言以細人夤緣引左光斗
入王安之幕移宮一疏謀傾宮眷中外迎合爭之者
僅一賈繼春而旋遭放逐此殺言官之始也周嘉謨

推重熊廷弼任為經畧此壞封疆之始也敗霍維華
以謝王安而逐戚畹撼中宮此又中外謀危母后之
始也 二月癸巳朔遼東督師尚書王之臣奏遼地
千里今欲尺寸而收之勢所不能莫若以遼民實遼
土有力者聽其自墾無力者酌借屯本為資俟秋成
徵還自寧遠以西及左右近城者舊貫可仍自此而
東久為戎馬之場宜分三等其近城處泉甘土沃為
上者三年起科稍遠而瘠為中者五年起科至於窮
邊沙鹵之場為下者永不起科上命即行之 甲午
上厭章奏冗長諭各衙門條奏務期簡明毋出千言

外如詞意未盡或再奏以聞 乙未諭選宮妃 癸
卯命翰林侍讀學士溫體仁直經筵日講 甲辰黃
州知府胡芳桂上八事曰足用莫先富民富民莫先
禁奢曰農工商賈各執其業而天下治曰漕政壞於
旂軍之貧運官之不肖把總之需索曰欲安民化俗
莫切於用賢令欲賢令莫切於郡守司道之監臨撫
按之監察曰天下臣僚善於共職者許其久任曰停
止進學納附曰免當舖助餉助工章下所司 四川
監軍叅議曹大受言西南土司安民為強所據之巢
又為天險之隘水內水外盡皆沃壤如議剿而圖大

創在相天時而參地利安氏寓兵於農季春仲夏民皆趨田驅之即我必不能悉衆而來此以實乘虛天時之不可失也貴陽至陸廣百里一河深險天之所以限南北也陸廣至大方百七十里賊巢基置進退皆難獨畢節一路諸部交通今為賊有故欲進兵必先取畢節據畢節則救援之路塞然後遵義永寧同日並舉應接不暇其鋒自折此剿之策也但黔蜀見兵六萬餉乏兵少不若據險扼要絕其商販禁苗仲耕鑿之利此守之策也不然鎮雄女官安位實為其甥令其開諭禍福酉陽之子冉天胤曾為軍前恭將

向傳目把之書苟因以通安位亦便也此議撫之策也章下所司清兵駐河上截降丁總兵官滿桂遣守備張守印以三百人潛渡河距守乃退蘇松常鎮水災命折光祿寺白糧一年免楊漣熊廷弼等誣贓復誣削諸臣劉一燝等原官誥勅御史高弘圖劾順天府丞劉志選太僕寺少卿梁夢環逮之戒諭廷臣交結近侍罷薊遼督師王之臣命袁崇煥為兵部尚書兼右副都御史督師薊遼登萊天津移駐閔門癸巳始御經筵賜講官宴及金帛三月壬戌朔召王永光為吏部尚書以王在晉為刑部

尚書 甲子禁漳泉人販海以御史周昌晉言先禁
海必先除內地之奸故有是命 乙丑大行皇帝
發引己巳薨德陵 大學士施鳳來張瑞圖並免遣
行人送還賜金幣廩役 清兵二萬餘騎屯錦州塞
以都令為嚮導攻克拱兔男青把都板城盡有其地
青把都遁免 癸酉盜焚劔州 丁丑奉熹宗愍皇
帝神主於慈寧宮 辛巳昧爽陝西天赤如血射牖
隙皆赤 重脩光宗皇帝寶錄成 發帑金五十萬
濟陝西軍餉 揀漢虎墩兔憨殺那木兒台吉 夏
四月癸巳賜進士劉若宰等三百五十人及第出身

有差 追卹故左都御史鄒元標高攀龍左副都御史楊漣左僉都御史左光斗工部尚書馮從吾應天巡撫都御史周起元諭德繆昌期翰林檢討丁乾學給事中吳國華魏大中太僕寺少卿周朝瑞御史吳裕中周宗建黃尊素李應升夏之令袁化中吏部郎中蘇繼殿員外郎周順昌刑部員外郎張汶工部郎中萬燦陝西按察副使顧大章揚州知府劉鐸各贈廕有差 前大學士方從哲卒 前少師兼太子太師建極殿大學士葉向高卒向高字進卿福清人以庶吉士歷禮部右侍郎進東閣大學士直文淵閣獨

相五年時神廟久不朝章跪留中向高因事補救神
廟心重之天啓初再相魏忠賢竊政向高欲調劑中
外事權掣肘遂乞致仕追贈太師諡文忠 庚子兵
科都給事中許可徵奏清錦衣衛詭籍上從之 許
給代府全祿不為例 命正一真人張顯庸禱雨

召前大學士韓爌入朝 琉球國中山王世子尚豐
入貢 甲寅冊立田氏為貴妃袁氏為淑妃 丙辰
倪元璐上言三朝要典成於逆豎逆豎殺人則借三
案群小求富貴則又借三案故凡推慈歸孝於先皇
正其頌德稱功於義父批根今日則衆正之黨碑免

死他年即上公之鉄券由此而觀三案者天下之共
議要典者魏氏之私書以臣所見惟毀之而已假閣
鑒之權後吏臣之筆亘古未聞當毀一未易代而有
編年不直書而加論斷若云規模大典則魏忠賢欲
與肅皇帝爭權悖逆非倫常毀二矯誣先帝偽撰宸
篇既不可比司馬光資治通鑑之書又不得援宋神
宗手序為例假竊誣妄當毀三上以已有實錄自不
必復增要典命禮部會史館諸臣詳議具奏 大兵
以二萬騎經廣寧西援揔漢 五月辛酉朔孫之獬
言要典必不可毀泣訴于朝御史吳煥劾其對君無

禮遂引疾去 癸亥命兵部戎政尚書霍維華署督
師事代王之臣工料給事中顏繼祖上言維華宵小
璫熾則借璫三敗則攻璫擊楊左者維華也楊左逮
而陽為救者亦維華也以刑科給事中三年躡致尚
書無叙不及有資必加即在維華難以自解乞立行
褫革以儆官邪遂罷維華行邊旋免之命王之臣不
得移鎮 丙寅太僕寺少卿楊維垣削籍御史鄒胤
祚劾維垣為逆璫私人占氣最先轉身最捷貪天為
功賣名市重亟宜處分故有是命 己巳燬三朝要
典 桑顏衛蘇不的即長昂孫也三十六家同伯顏